

sanae mentis somniavit unquam. Ad id quippe, juxta communem sensum, sufficit voluntas creata, quae, quia est ex nihilo et labe originali vitiata, est primum principium deficiens.

Ex his itaque concludo et firmissime tenendum moneo, quod, quamvis verum sit hominem ideo consentire gratiae sufficienti, quia habet per se efficacem, falsum sit tamen ideo resistere sufficienti, quia caret efficaci; sed, e contra, ideo caret efficaci, quia resistit sufficienti, proindeque merito imputatur illi quod ea careat, et quod, ea absente, non impleat mandatum. Causa vero cur resistat sufficienti non alia querenda est, ut jam dixi, quam mala voluntas.

Inst. Privatio gratiae per se efficacis praecedit culpam et resistantiam sufficienti, estque causa illius. Ergo, non ideo homo privatur gratia efficaci, quia peccat et resistit sufficienti, sed, e contra, ideo resistit et peccat, quia privatur gratia. — *Prob. ant.* Si adesset gratia per se efficax, non resisteretur sufficienti. Ergo privatio gratiae per se efficacis est causa cur resistatur.

Resp. Negamus absolute ant., cuius falsitatem jam asserimus ex S. Thoma, et iterum nunc magis probanda, quia in hoc vertitur cardo difficultatis. Verum est itaque, hominem peccare seu resistere gratiae sufficienti, et privari gratia efficaci, esse simul tempore; at, ordine et natura, peccatum seu resistantia gratiae sufficienti praecedit, et sequitur privatio gracie efficacis. Relegantur quae jam protulimus ex S. Thoma, et attendatur ad sequentia: « Hominem carere gratia, inquit S. Doctor in *ISent.*, dist. 40, q. 4, a. 2, ex duabus contingit: tum quia iste non vult recipere; tum quia Deus non sibi infundit, vel non vult sibi infondere. Horum autem duorum talis est ordo, ut secundum non sit nisi ex suppositione primi. Cum enim Deus non velit nisi bonum, non vult istum carere gratia, nisi secundum quod bonum est; sed quod iste careat gratia, non est bonum simpliciter. Unde hoc, absolute consideratum, non est volitum a Deo. Est tamen bonum ut careat gratia, si eam habere non vult, vel si ad eam habendam negligenter se preparat, quia justum est, et

DISSERT. VIII. DE PRÆDEFINITIONIBUS DIVINIS 201

hoc modo est volitum a Deo. Patet ergo quod hujus defectus absolute prima causa est ex parte hominis qui gratia caret; sed ex parte Dei non est causa hujus defectus, nisi ex suppositione illius quod est causa ex parte hominis. » Quo quid clarius aut expressius dici potest, non appareat. Quamvis ergo, ut dixi, haec duo sint simul tempore, et peccare hominem, et Deum ipsi gratiam denegare, hic tamen est ordo constitutus, ut nunquam Deus deneget gratiam, nisi quia homo non vult eam recipere, non quidem directe (nemo enim tam sibi inimicus est, ut velit directe gratia privari), sed indirecte, in quantum ponit actum incompossibilem cum gratia et actu ad quem moveret, si adasset. Et hoc ideo quia Deus non vult nisi bonum, quod autem homo careat gratia, non est bonum simpliciter; sed quod ea careat, quia eam habere non vult, aut negligenter se ad eam preparat, est bonum, quia justum.

Ad probationem itaque antecedentis, *concesso* anteecedente, *nego* consequens. Ex eo enim quod, si adasset gratia per se efficax, non resisteretur sufficienti, bene sequitur quod gratia efficax sit causa non resistantiae seu consensus, at inde non sequitur quod absentia gratiae sit causa resistantiae; haec quippe aliunde habet suam causam, scilicet malam voluntatem, quae est primum principium deficiens, vel ex ingenita corruptione qua ad malum proclivis est, vel ex nativa defectibilitate, ut est ex nihilo, juxta illud jam laudatum S. Aug., *de Corrept. et Grat.*, c. 41, n. 31: « Liberum arbitrium ad malum sufficit, ad bonum autem nihil¹ est, nisi adjuvetur ab omnipotenti bono. »

Urgebis: Juxta regulam dialecticæ, « si affirmatio est causa affirmationis, etiam et negatio erit causa negationis, » seu, quod in idem redit, « oppositorum est eadem ratio, » ut si sol lucens est causa diei, sol non lucens est causa non diei, seu noctis. Ergo, si gratia efficax sit causa

1. *Nihil est*, juxta Lovan. Editi alii et mss. *parum est*. Quod idem est, nam *parum* est pro *insufficiens*, seu *nihil*.

consensus seu adimpletionis præcepti, subtractio gratiæ est causa dissensus, seu non adimpletionis præcepti.

En, ni fallor, ultima meta argumenti usque ad tricas dialectices producti; sed, quod forte miraberis, neque illud praetermisit S. Thomas, ex quo magis ac magis perspicies quantum a S. Doctore dissentiant qui nobis hæc objiciunt. Itaque S. Thomas, in I Sent., dist. 40, q. 4, a. 2, n. 3, hoc argumentum sibi proponit : « Secundum Philosophum, in Posterioribus (*analyt.*), lib. I, textu 30, inquit, si affirmatio est causa affirmationis, et negatio est causa negationis. Sed velle divinum est causa quod ipse habeat gratiam, quia scilicet ipse vult. Ergo videtur quod non velle Dei sit causa quare iste gratiam non habeat. » En prorsus et in terminis idem argumentum, ita ut crederes adversarios ipsum a S. Thoma emendicasse. Sic autem respondet S. Doctor : « Ad tertium dicendum, quod effectus non consequitur, nisi concurrentibus omnibus causis. Sed ex defectu unius, consequitur negatio effectus. Dico ergo quod causa gratiæ, sicut agens, est ipse Deus, et sicut recipiens est ipsa anima, per modum subjecti et materiæ : et ideo, quia formæ inductæ non est causa materia, neque subjectum, nisi tale ex cuius principiis fluit accidens, quale accidens non est gratia; ideo non dicitur simpliciter anima causa gratiæ, sed recipiens tantum, Deus autem causa. Nec oportet quod omnis defectus incidat ex parte agentis, sed potest incidere ex parte recipientis, et ita est in proposito. » Sensus itaque solutionis D. Thomæ est, quod hæc regulæ dialectices valeant dumtaxat quando ex utraque parte omnia principia eodemque modo concurrunt; secus, si alterum principium desit. In receptione autem gratiæ, omnia principia concurrunt, non in ejus negatione. Ut enim homo recipiat gratiam, necesse est duo concurrere : et Deum velle infundere, et hominem velle recipere; quia infusio gratiæ est bonum, et bonum producitur concurrentibus omnibus causis. Ut autem homo careat gratia, sufficit unum deesse, nempe hominem nolle; quia, cum privatio gratiæ sit malum, ex unius causæ defectu oritur. Ex quo consequitur, Deum equidem causam esse cur homo habeat gratiam, et bene agat, non

tamen causam esse cur gratia privetur et male agat; sive que hic non concurrere dictas regulas dialecticæ. Insuper hæc regulæ locum dumtaxat habent quando rei affirmatae opponitur pura ejus negatio, ut, in exemplo solis, diei affirmatae opponitur nox, quæ est mera negatio diei; secus vero, si ex parte negationis involvatur aliquid positivum, quod aliunde propriam causam habeat, sicut contingit in proposito; non enim resistantia, seu dissensus, qui ex parte negationis opponitur consensui, fit per meram negationem seu suspensionem consensus, sed per actum positivum inordinatum, cujus prima et integra causa est, ut jam non semel dixi, mala voluntas. Sic magister dirigens manum discipuli, est causa cur bene scribat; si autem discipulus repellat manum magistri et male scribat, causa mala scriptioñis non est absentia magistri, sed imperitia discipuli, et mala ejus voluntas, qua adjutorium magistri recusavit.

Solvuntur objectiones ex affinitate cum Calvinismo.

Objicies : « Gratia a se efficax est novum Lutheri Calvinique commentum, et ad illorum tempora in Ecclesia Catholica inauditum, oppugnatum ab academiis et Ecclesiæ doctoribus, tum antea, tum post synodum (Tridentinam) collectam, et a concilio reprobatum. » Ita se, re hac diligenter examinata, existimare promuntiat P. Livinus de Meyer, Belga, novus e Societate scriptor, novo, dicam, odio, an furore? adversus Scholam Thomisticam concitus, in prima dissertatione de mente concilii Tridentini, quæ sub larvato nomine Liberii Gratiani primum prodiit anno 1709.

Hanc calumniam Thomistis primus struxit P. Bastida, agens nomine Societatis in Congregationibus de Auxiliis, quam, plaudente sacro consessu, exsufflavit P. Lemos, actor pro Prædictoribus. Hanc autem accusationem, non veritatis, sed recriminandi studium ab adversariis extorrisse testatur Ripalda, alter ex eodem Sodalito scriptor, tom. II, disp. 413, sect. 9, n. 53 : « Bannes, inquit, et plerique ejus discipuli in publicis disputationibus privatisque

sermonibus et scriptis cōperunt notare illam sententiam (Molineæ) Pelagianam. Contra nostri, ut notam Pelagianismi suę sententię evitarent, objiciebant opposite (Thomisticæ) notam Calvinismi. » Non ergo quod erēderent sententiam Thomisticam esse Calvinianam, sed, ut notam Pelagianismi declinarent, Calvinismum Thomistis objiciebant.

Post quadraginta circiter annos, Franciscus Annatus, ejusdem Societatis, eamdem calumniam instauravit; sed postea, poenitentia ductus, aut quod forte aliud exigeret ratio temporum, palinodiam cecinit, et in pluribus operibus variis argumentis ostendit, quod ipsi facile erat, Thomista longe a Calvinismo et Jansenismo distare. Idem præsterunt ejus sodales Stephanus Dechamps, lib. II de *hæresi Jansen.*, disp. 6, cap. 9; Joannes Martinonus, in suo *Anti-Jansenio*; novissime Pater Josephus Sanfelicius, in opere dicato summo Pontifici Benedicto XIII, cui titulus: *Jansenii doctrina ex Thomistica schole principiis damnata*, et plures alii. Qua ergo frōte Livinus de Meyer hanc ineptissimam calumniam reficare ausus est, contradicentibus sociis, imo prohibentibus summis Pontificibus?

Novit quippe universus orbis litterarius, quanto studio summi Pontifices doctrinam de gratia per se efficaci coluerint, et ab omni nota tutam esse voluerint. Ut sileam de antiquis Pontificebus Innoc. I, Zosimo, Coelestino, Gelasio, Hormisda, qui doctrinam Augustini, quæ est ipsissima doctrina gratiæ per se efficacis, quidquid reclamant adversarii, contra obrectantes defenderunt et ut doctrinam Ecclesiae habuerunt. Item de Clemente VIII et Paulo V, de quibus jam diximus. Omnibus notum est, summos Pontifices qui in causa Jansenii egerunt, summa semper adhibuisse cautelam, ut in tuto esset sententia gratiæ per se efficacis et prædestinationis gratuitæ ad gloriam.

Id inter alios præstitit Clemens XI, in litteris *Pastoralis officii*, datis 7 septembribus 1718. Deinde Benedictus XIII, in brevi *Demissas preces*, dato 6 septembribus 1723, postquam declaravit Thomistas « laudabiliter hactenus » docuisse sententias de gratia per se efficaci et prædestinatione gra-

tuita ad gloriam, eosque « commendabili studio gloriari eas a SS. Augustino et Thoma hausisse, et verbo Dei, summorum Pontificum et conciliorum decretis et Patrum dictis consonas esse, » prohibet sub poenis canonicas, ne quis dicat hanc doctrinam ullo Ecclesiæ decreto esse proscriptam, aut « similes calumnias struere » audeat. Et in bulla *Pretiosus*, data 7 kal. junii 1727, § 41: « Sub divini, inquit, interminatione judicii, iterumque sub canonicas poenis, omnibus et singulis Christi fidelibus mandamus, ne doctrinam memorati S. Doctoris ejusque insignem in Ecclesia scholam, præsertim ubi in eadem schola de divina gratia per se et ab intrinseco efficaci, ac de gratuita prædestinatione ad gloriam sine ulla meritorum prævisione agitur, ullatenus dicto vel scripto contumeliose impetant, ac velut consentientem cum damnatis ab Apostolica Sede, et signanter a constitutione LXIV dicti fel. record. Clementis XI incipiente *Unigenitus*, Jansenii, Quesnelli et aliorum erroribus traducant. »

Clemens XII, constit. *Verbo Dei scripto*, data 4 kal. septembribus 1733, approbat omnia elogia et privilegia data a Benedicto XIII scholæ Thomisticæ, et recensitis duodecim summis Pontificibus qui doctrinam S. Thome laudaverunt et probarunt, eupiens ipse quoque tanti viri doctrinam « in conciliis etiam œcumenicis celebratam debitum præconiis, rei publicæ causa, ornare, » concedit Ordini Prædicatorum privilegium conferendi doctoratus lauream iis qui « ejusdem sancti viri doctrinam in gymnasiis Ordinis eorumdem FF. Prædicatorum (N. B.) tradi solitam, triennio audiverint in quibuscumque gymnasiis, scholis, studiis et collegiis ejusdem Ordinis. »

Cum autem Scholæ nostræ æmuli tot elogia et prærogativas non satis æquo animo ferrent, ea de re conquesti sunt apud eumdem Clementem XII. Is, ut eorum querelas compesceret, aliud breve edidit 2 octob. 1733, quod incipit *Apostolicæ providentiae*, in quo que dixerat in laudem et defensionem doctrinæ Thomisticae confirmat et corroborat, et quod quibusdam videbatur deesse sue constitutioni *Verbo Dei* superaddit, exprimendo scilicet

agi de doctrina gratiae efficacis; juxta sententiam SS. Augustini et Thomæ, et Thomistarum; et ad qualemque querulorum solatium declarat, « per laudes schole Thomisticae delatas, nihil esse detractum cæteris catholicis scholis, » sed servandum mandatum Pauli V, « donec de iisdem controversiis hæc sancta Sedes aliquid definendum ac pronuntiandum censuerit. »

Cæco cœciorem esse oportet, qui non videt, juxta SS. Pontifices, eamdem prorsus esse S. Thomæ et Thomistarum doctrinam circa efficaciam divinae gratiae et prædestinationem gratuitam, subindeque nullum amplius superstesse locum distinguendi, ut solebant adversarii, inter doctrinam D. Thomæ et Thomistarum, atque eos esse apertos et pertinaces calumniatores, qui effutunt eam esse damnatam decretis Pontificum et conciliorum; de quo lege *Thomismus triumphans*¹, II p., a. 2, et ejus *Apolog.*, § 24. Ex his jam vides quo loco habendus sit Livinus de Meyer et ii qui illi concinunt; sed in aperto erit calumnia, si exponamus succincte

*In quo sit situs error Lutheri et Calvini
circa præsentem materiam.*

Uterque hæresiarcha contendit, peccato Adæ extinctum fuisse in homine liberum arbitrium. Sic Lutherus, art. 36, inter damnatos a Leone X: « Liberum arbitrium, post peccatum, res est de solo titulo, et dum facit quod in se est, peccat mortaliter. Imo simpliciter dicere debui: Est figmentum in rebus, seu titulus sine re, quia nulli est in manu sua quippiam cogitare mali aut boni, sed omnia, ut Wiclefi articulus Constantiae damnatus recte docet, de necessitate absoluta eveniunt... Non est dubium, Satana magistro in Ecclesiam venisse hoc nomen, liberum arbitrium. » Et quamvis hunc errorem visus sit aliquando temperasse, semper tamen sustinuit, liberum arbitrium nihil agere, sed mere passive se habere, ut inanime quoddam.

1. Authore P. Hyacintho Serry, ex Ord. Prædicat.

Calvinus, lib. II *Inst.*, cap. 1, cui præfigit hunc titulum: « Hominem arbitrii libertate nunc esse spoliatum et miseræ servituti addictum, » dicit: « Libero arbitrio pollebat homo in prima conditione creationis, quod lapsu suo amisit. » Addit, hoc ignorasse philosophos, et plane « despere qui eos sequuntur, et liberum in homine arbitrium adhuc querunt. » Hoc primo principio posito, Calvinus non agnoscit in homine aliam libertatem quam a coactione, seu spontaneitatem. *Inst.*, lib. II, cap. 2, § 7: « Liberi ergo arbitrii, inquit, hoc modo dicitur homo, non quia liberam habeat boni æque ac mali electionem, sed quia male voluntate agit non coacte. » Lib. II *Contra Pigum*: « Si coactioni opponatur libertas, liberum esse arbitrium, et fateor, et constanter assevero, et pro hæretico habeo quisquis secus sentiat; si hoc, inquam, sensu liberum vocatur, qui non cogitur aut violenter trahitur externo motu, sed sponte agit sua, nihil moror. » Hinc docet, hominis voluntatem nihil cooperari divinæ motioni assentiendo: non quod passive se habeat instar lapidis jacti, ut vult Lutherus, sed quia non est relictum ejus electioni assentiri vel dissentire, sed necessario ipsam sequatur, « sicut, inquit, jumentum sequitur, » non libere, sed « sponte sessoris ductum; » quod ideo non dicitur sessori cooperari. Cap. 3 cit. lib. II *Inst.*

Ex his plusquam evidens est, majorem non intercedere affinitatem inter doctrinam Thomisticam et Calvinianam, quam inter contradictoria. Etenim Calvinus negat in homine lapso liberum arbitrium, hoc est libertatem indifferentie qua possit se flectere in utramque partem, et vult solum in eo remanere libertatem a coactione tantum, seu meram spontaneitatem. Thomistæ dicunt, in homine lapso remanere liberum arbitrium, seu libertatem indifferentie, qua se flectere possit in utramque partem, et esse liberum, non solum a coactione, sed etiam a necessitate; agnoscent tamen eum Ecclesia, liberum arbitrium per peccatum originale fuisse attenuatum. Calvinus negat, hominem cooperari motioni divinæ: Thomistæ affirmant. Calvinus negat, voluntatem posse dissentire gratiæ: Tho-

mistæ affirmant. Et hæc tria Calvini asserta concilium damnavit.

*Solvuntur objectiones
ex læsione sanctitatis divinæ.*

Quæ hic usque diximus, spectant specialiter voluntatem divinam et ejus motionem in ordine ad bonum in opere salutis. Sed quia, in principiis D. Thomæ et Thomistarum, decreta et præmotiones Dei, ut sic, extenduntur ad omne ens, etiam ad actum peccati, arguunt adversarii id repugnare sanitati Dei, ipsumque efficere authorem peccati; quod est error Calvini damnatus in concilio Trid., sess. vi, can. 6. Itaque

Objicies 1º: Ille merito censetur author et causa peccati, qui concursus prævio per se efficaci movet et determinat ad actum peccati. Atqui Deus, juxta Thomistas, concursu prævio per se efficaci et infallibili movet et determinat ad actum peccati. Ergo.

Resp. 1º hanc difficultatem non esse nobis propriam, sed esse etiam solvendam ab adversariis, qui tenent Deum concurrere concursu simultaneo ad actum peccati. Vel enim concursus ille simultaneus ad entitatem peccati præscindit a malitia, vel non. Si præscindat, pari jure id dicimus de concursu prævio, imo potiori jure, cum concursus prævious mediate tantum attingat actum peccati, mediante scilicet voluntate; concursus autem simultaneus, utpote identificatus cum actione creaturæ, illum immediate attingat. Si non præscindat, ergo Deus erit cooperator malitiae seu peccati formaliter, quod non videtur multo minus impium et blasphemum, quam ipsum dicere authorem malitiae.

Resp. 2º. Dist. maj. Ille merito censetur, etc., si non præscindat a malitia, *conc.*; si præscindat a malitia, *nego*: ad cuius sensum distincta min., *nego* conseq. Deus itaque, quantumvis physice præmoveat ad actum peccati, non tamen attingit malitiam, sed ab ea præscindit, quia præmovet ad actum peccati motione generali in ordine

physico, ut primum principium efficiens; ideoque attingit solum in eo quod est effectus et entitatis physicae. Malitia autem non est aliquod ens, nec pertinet ad ordinem physicum, sed est defectus, privatio, imo merum nihil; consequenter non oritur a principio efficiente physice, sed a deficiente moraliter, quod est creata voluntas, quatenus est ex nihilo. Id variis exemplis illustratur. Sic anima movens et præmovens tibiam curvam est causa totius motus, non tamen est causa defectus claudicationis, qui in solum defectum, seu curvitatem tibiae, refunditur.

Et haec est constans et perpetua doctrina S. Thomæ, q. 3 *de Malo*, a. 2; in II *Sent.*, dist. 37, q. 2, a. 2; 4^a 2^o, q. 79, a. 2, et alibi. Hinc Aug., lib. XII *de Civit.*, cap. 7: « Nemo, inquit, querat efficientem causam male voluntatis; non enim est efficiens, sed deficiens, quia nec illa effectio est, sed defectio. » Haec non viderat Livinus de Meyer, dum dixit, quod istud, « *causa efficiens et deficiens* sit fucus tyronibus. »

Ex his igitur habemus, quod modo dicebam, Deum, ut primum et universale principium totius entis et boni, movere voluntatem creatam ad actum qui est ens et bonum; sed, quia voluntas ex se ipsa est in dispositione indebita, et deviat ab ordine primi moventis, detorquet ejus motionem, unde sequitur actio inordinata. Sieque Deus, ut principium efficiens in ordine physico, est prior in bonis, et voluntas creata, ut principium deficiens in ordine morali, est prior in malis: ita ut non male quidam ex nostris observaverint, quod, licet decretum quo Deus ab æterno statuit ad actus peccaminosos tam angelorum quam hominum concurrere, et motio qua in tempore eos ad id movet, aliquo vero sensu vocentur *prædefinition* et *prædeterminatio*, quia prædefinit entitatem actus et ad eam præmovet; attamen alio sensu possint vocari *postdefinition* et *postdeterminatio*, quia Deus ab æterno non prædefinit entitatem actus cui conjugitur malitia, nec ad eam in tempore præmovet, nisi quia voluntas creata prius deviat ab ordine primi agentis, et est in dispositione indebita ad recipiendum divinam motionem ex qua

sequitur actio inordinata, quæ alioquin fuisset bona et ordinata.

Inst. 1^o. Sunt quidam actus essentialiter et secundum speciem mali, ut odium Dei, blasphemia. Atqui quod est causa alicuius, est causa ejus quod convenit illi secundum rationem suæ speciei: sicut si aliquis sit causa *Socratis*, sequitur quod sit causa hominis. Ergo.

Resp. 1^o hanc instantiam pariter militare contra concursum simultaneum ad actum peccati.

Resp. 2^o S. Thomam hoc argumentum sibi objicere q. 3 de *Malo*, a. 2, cui sic respondet: « Ad secundum dicendum, quod deformitas peccati non consequitur speciem actus secundum quod est in genere naturæ: sie autem a Deo causatur; sed consequitur speciem actus secundum quod est moralis, et causatur a libero arbitrio. » Idem docet 1^o 2^o, q. 79, a. 2, ad 3. Unde, quamvis hæc prædicatio: « Blasphemia est peccatum, » sit essentialis, hæc tamen: « Hic actus (demonstrato actu blasphemie), est peccatum, » non est essentialis, sed accidentalis, quia actui humano, secundum quod est actus, accedit quod sit peccatum: sicut, liet cæcitas sit essentialiter privatio, accedit tamen oculo quod sit cæcus.

Objicies 2^o: Si Deus moveret moraliter ad actum peccati, foret causa peccati. Ergo, a fortiori, si præmoveat physice. Patet conseq.; quia præmotio physica fortius movet, quam moralis.

Resp. 1^o retorquendo argumentum. Deus fortius concurrit ad actum peccati per concursum simultaneum, quam per motiones morales. Atqui, si concurreret per motiones morales, foret causa peccati. Ergo, a fortiori, concurrendo per concursum simultaneum.

Resp. 2^o. Nego conseq. Ad prob., *dist.* Præmotio physica fortius intensive movet, quam motio moralis, *conc.*; fortius extensive, *nego*; quia motio physica movet tantum ad rationem entis et præscindit a malitia morali; non sic motio moralis. Hujus disparitatis est multiplex ratio. 1^o Motio physica fundatur in activitate physica agentis. Ergo attingit tantum in effectu actualitatem physicam.

2^o Est motio causæ universalissimæ. Ergo attingit dumtaxat in effectu rationem universalissimam et nobilissimam, quæ est ratio entis. 3^o Est motio principii efficientis et non deficientis. Ergo attingit effectum, et non defec- tum. 4^o Est motio primi principii. Ergo nihil attingit quod in ipsum non sit reducibile tanquam in ultimum finem; quia primum principium et ultimus finis convenient, malitia autem non est reducibilis in Deum ut in ultimum finem, cum sit aversio ab illo. Cum ergo motio moralis nullo ex his titulis gaudeat, non habet unde, movendo ad actum peccati, præscindat ab ejus malitia.

Objicies 3^o: Durum videtur et a divina bonitate atque justitia alienum, quod hominem in æquilibrio positum ad bonam vel malam actionem, ab æterno definit et in tempore præmoveat ad malam potius quam ab bonam; sique peccantem puniat in æternum. Ergo.

Resp. 1^o retorquendo argumentum in congruistas. Durum videtur et a bonitate divina alienum, quod hominem, sive lapsum, sive integrum, constitut in iis circumstantiis in quibus prævidet ipsum certo peccaturum, et non in iis, ut ipsi liberum est, in quibus certo prævidet bene acturum; sique peccantem puniat in æternum.

Neque dicant, hominem in circumstantiis incongruis constitutum se libere determinare ad malam actionem; hoc enim et nos dicimus de homine sub Dei præmotione, quia non est tantum ad substantiam, sed etiam ad modum actus. Sed id jam non queritur. Questio et dumtaxat, cur Deus decernat ab æterno me constituere, et in tempore me constitut in iis circumstantiis in quibus certo prævidit me peccaturum, quovis modo peccem, et non in iis in quibus prævidit certo me non peccaturum, cum alterum aequo jure posset. Hie haerent aquæ, nec video quo congruista in sua sententia configere possint nisi ad inscrutabilia Dei judicia.

Resp. 2^o. Nego suppositum antecedentis. Nunquam enim dixerunt nec somniarunt Thomiste, Deum hominem in æquilibrio possum ad bonam vel malam actionem, movere ad malam potius quam ad bonam; quin, e contra,

constanter dixerunt et dicunt, oriri ex creatura quod potius determinetur ad actionem cui juncta est malitia, quam ad oppositam, nec Deum unquam determinare ad materiale peccati, nisi creatura se prius quodammodo determinaverit ad formale; quia Deus, ut provisor universalis, movet unumquemque secundum ejus exigentiam et dispositionem, consequenter non movet ad actionem malam nisi voluntatem ex se male dispositam et sic moveri exigentem; ita ut indebita voluntatis dispositio objective determinet Deum ad movendum ad actum malum. Confer quae dixi supra.

Objicies 4º: Juxta communem sententiam Thomistarum, formale peccati consistit in positivo, scilicet in positiva tendentia ad objectum dissonum regulis morum. Ergo, si Deus per influxum prævium sit causa omnis entis, erit causa formalis peccati.

Resp. sententiam constituentem formale peccati in privativo, nunc invalescere etiam apud Thomistas. Hi tamen qui primam opinionem tenent, habent etiam quo ab hac difficultate se expediant. Dupliciter enim considerant ipsum positivum formale peccati: 1º materialiter, et est ipsa tendentia positiva, seu entitas physica præcise ut est entitas; 2º formaliter, prout est fundamentum privationis et illi substat. Sub prima ratione dicunt causari a Deo, non sub secunda; quia, qua tale, non potest causari nisi ab eo a quo causatur ipsa privatio. Unde sic *distinguunt* ant. Formale peccati consistit in positivo, ut substat privationi et illam habet conjunctam, *conc.*; consistit in positivo, prout præcise est ens physicum, seclusa privatione, *nego*. Similiter *distinguunt* conseq. Ergo, si Deus sit causa positivæ entitatis ut substat privationi, erit causa malitiae, *conc.*; secus, *nego*.

Pro coronide hic notari velim, quod jam ante me quidam observarunt, doctrinam gratiæ per se efficacis ad actus supernaturales ab hac sententia de prædeterminatione ad materiale peccati non dependere; ita ut, si hæc foret minus vera, staret nihilominus dogma gratiæ per se efficacis, utpote aliis et firmioribus principiis nixum. Sunt

namque theologi qui gratiam infallibiliter efficacem, hoc est, a divina voluntate, et non a consensu voluntatis humanæ aut directione scientiæ mediae, propugnant per delectationem aut motionem moralem, ut Augustiniani et alii. Sunt qui illam defendunt per prædeterminationem physicam, quam tamen non extendunt ad actus naturales, nec ad materiale peccati: ita Steyaert, Neezen, Boudart, et, ut audio, communiter Lovanienses, imo quidam ex Thomistis, ut refert Alvares lib. III *de Auxiliis*, disp. 24, n. 27. Hæ ergo dueæ questio[n]es: an gratia per se efficax in ordine salutis debeat explicari per prædeterminationem physicam; an hæc prædeterminatione debeat extendi ad actus naturales et ad materiale peccati,—sunt mere philosophicæ et incidentes ad dogma capitale gratiæ per se efficacis. Nos equidem utramque defendimus tanquam probabiliorem secundum principia rationis; at gratiam per se efficacem, hoc est, gratiam infallibiliter efficacem ex omnipotentissima Dei voluntate, independenter a consensu creature et scientia media, propugnamus tanquam dogma theologicum, cum principiis fidei connexum et proxime definibile, et ita nobiscum omnes ferme scholæ, excepta Moliniana. Amant tamen et conantur adversarii hanc duplicem quæstionem philosophicam confundere cum dogmate gratiæ efficacis, ut inferant per illud, Deum auctorem peccati fieri, sive ipsum apud plebeios et mulierculas odiosum reddant. Verum semel agnoscant, gratiam ad opus salutis necessariam non esse indifferentem et determinabilem a voluntate humana; sed, e contra, voluntatem per eam infallibiliter determinari, totam vim et efficaciam suam haurire ex omnipotentissima Dei voluntate, et hac vi atque efficacia infallibiliter consequi effectum independenter a scientia media: hoc, inquam, semel admittant, et, si libuerit, rejiciant prædeterminationem physicam, vel absolute, vel saltem ad materiale peccati, dimicabimus ut philosophi, confoederabimus ut theologi, nec unquam ideo item ipsis movebimus, sicut contigit in Congregationibus de Auxiliis. Hac de re consule *Thomismum triumph.*, I p., a. 4. § 1, et ejus *Apolog.*, § 4.